

文內用字譏侮以此凡遇朝貢不許再用表箋今次將來啓本
內用字又不停當此皆是所用秀才設機用意故將字樣聲響
相似者輾成語句譏侮自生釁端豈朝鮮久長之道差來使臣
且不放回止令打角夫一人還國以報王知將撰寫啓本人
負數來回話方令使臣回國今後朝貢每三年來一次亦不必
用奏啓本王當審之○丁酉奉化伯鄭道傳請曰京中醫者
不多乞宥吳慶祐金之衍等上允之○戊戌雨雹○日珥軋
方有赤氣○庚子以奉化伯鄭道傳為東北面都宣撫巡察使
教曰予以否德承祖宗積累之德奄有東方六年于茲報
本之誠實切于衷是用稽諸古典追王四代首建寢廟瑩域
之封悉皆除治享祀以時唯德陵安陵邈在孔州道里遼遠
奉祀之誠有所未盡每思修治以時享祀因循至今良用歉然
卿學通古今才兼文武一代典章由卿制作今命卿為東北面
都宣撫巡察使卿其往也凡所以奉安園陵者悉從盛典舉
行無遺繕完城堡以安居民量置站戶以便往來區畫州郡之